

歷代刑法考

赦一

刑法考

原赦

易解卦象傳雷雨作解君子以赦過宥罪疏赦謂放免過謂誤失宥謂寬宥罪謂故犯過輕則赦罪重則宥皆解緩之義也程傳天地解散而成雷雨故雷雨作而爲解也赦釋之宥寬之過失則赦之可也罪惡而赦之則非義也故寬之而已君子觀雷雨解之象體其發育則施恩仁體其解散則行寬釋也 邱濬曰按雷雨作解君子以赦過宥罪蓋言易卦之象如此爾人君於人之有過者而赦之有罪者而宥之亦猶易之有是象也然過有小大過失之小者固不必問若事雖過失而事體所關則大如失火延燒陵廟射箭誤中親長之類其罪有不可釋者原其情則非故也故因時赦其罪以宥之宥如流宥五刑之宥也所謂

罪者過失而入於罪者耳若夫大愆極惡之罪殺人不死則死者何辜攫財不罪則失者何苦雷雨作解豈謂如是之人哉

按此罪字如邱說則與赦過無分別矣當是情可矜原者故寬之卽舜典流宥五刑之意

舜典眚災肆赦傳眚過災害也肆緩也過而有害者緩赦之疏若過誤爲害原情非故者則緩縱而赦放之史記五帝紀集解鄭元曰眚哉爲人作患害者也過失雖有害則赦之 邱濬曰朱子曰言不幸而觸罪者則肆而赦之此法外意也按此萬世言赦罪者之始夫帝舜之世所謂赦者蓋因其所犯之罪或出於過誤或出於不幸非其本心固欲爲是事也而適有如是之罪焉非特不可以入常刑則雖流宥金贖亦不可也故宜赦之蓋就一人一事而言

耳非若後世概爲一札併凡天下之罪人不問其過誤故  
犯一切除之也

按易訟无眚釋文鄭注眚過也是鄭亦訓眚爲過災爲  
害故云過失雖有害則赦之東晉之孔傳正用鄭說也  
史記集解胥下疑奪過也二字以致詞不別白江氏聲  
音疏引此文而刪上九字蓋疑之也

周禮秋官司刺掌三刺三宥三赦之法以贊司寇聽獄訟

注赦舍也壹刺曰訊羣臣再刺曰訊羣吏三刺曰訊萬民

壹宥曰不識再宥曰過失三宥曰遺忘注鄭司農云不識

宥之過失若今律過失殺不坐死元謂識審也不審若今

仇讎當報甲見乙誠以爲甲而殺之者過失若舉刃欲砍

伐而誤中人者遺忘若問惟薄壹赦曰幼弱再赦曰老耄

忘有在焉而以兵矢投射之注意恩生而癡駘童昏者鄭司農云幼弱老

三赦曰蠢愚注意恩生而癡駘童昏者鄭司農云幼弱老  
人他皆注意恩生而癡駘童昏者鄭司農云幼弱老  
不坐邱濬曰按赦有二者之義蓋就其所犯之人品

原其所犯之情實而赦之宥之也其與後世所頒之赦異矣

地官司諫掌糾萬民之德而勸之朋友正其行而強之道

藝勸也

巡問而觀察之以時書德行道藝辨其能而可任

於國事者以攷鄉里之治以詔廢置以行赦宥注因巡問勸強萬民而考鄉里吏民罪過以告王所當罪不疏司諫考鄉里之治者由上文巡問即察官民善不也云而考鄉里吏民罪過者以巡問觀察萬民則知吏之治不故鄭兼吏民總言之

司市國君過市則刑人赦注市者人之所交利而行刑之處君子無故不游觀焉若游觀則施惠以爲說也國君則赦其刑人

按司市云市刑小刑憲罰中刑徇罰大刑扑罰此所謂

刑人卽犯此三者之人也

呂刑五刑之疑有赦五罰之疑有赦其審克之傳刑疑赦從罰罰疑赦從免其當清察能得其理蔡傳疑于刑則質于罰也疑于罰則質于過而宥免之也 邱濬曰按此所謂有赦者赦其有疑者耳非若後世不問有疑無疑一概蠲除之也

按如孔傳之說則此節所云卽漢之赦降今之減等也  
下節墨辟疑赦云云乃是贖法詳贖

王制赦從重注雖是罪可重猶赦 疑獄訊與衆共之衆疑赦之 凡作刑罰輕無赦注法雖輕不赦之爲人易犯疏此非疑獄故雖輕不赦也若輕者輒赦則犯者衆也故書云刑故無小

論語仲弓爲季氏宰問政子曰先有司赦小過舉賢才朱

注過失誤也大者於事或有所害不得不懲小者赦之則刑不濫而人心悅矣范氏曰不赦小過則下無全人矣

按管子之旨與孔子之言正相反此王霸之分也

通考

一百七十一

管仲曰文有三情

按今管子作有

武無一赦楚陶朱

公中子殺人繫獄乃令其長子賫千金遺楚王所信善莊生請之莊生入見楚王言某星宿某獨以德爲可以除之王乃使使者封三錢之庫楚人告朱公長男曰王且赦曰何以也曰每王且赦常封三錢之府昨暮王使使封之朱公長男以爲赦弟固當出重千金虛棄莊生以爲殊無短長也乃復見莊生以爲王且赦莊生乃還其金羞爲所賣復入言王曰臣前言某星王言欲修德報之今臣出道路皆言陶之富人朱公之子殺人囚楚其家多持金錢賂王左右王非爲楚國而赦乃以朱公子故也楚王大怒令論

殺朱公子明日遂下赦令按唐虞三代之所謂赦者或以其情之可矜或以其事之可疑或以其在三赦三宥八議之列然後赦之蓋臨時隨事而爲之斟酌所謂議事以制者也至後世乃有大赦之法不問情之淺深罪之輕重凡所犯在赦前則殺人者不死傷人者不刑盜賊及作姦犯科者不詰於是赦遂爲偏枯之物長姦之門今觀管仲所言及陶朱公之事則知春秋戰國時已有大赦之法矣

春秋莊二十二年春王正月肆大眚穀梁傳肆失也眚災也集解易稱赦過宥罪書稱眚災肆赦經稱肆大眚皆放赦罪人蕩滌衆故有時而用之非經國之常制 災紀也失故也集解災謂罪惡絕治理也有罪當治理之今失之者以文姜之故 爲嫌天子之葬也集解文姜罪應誅絕誅絕之罪不葬若不赦除衆惡而書葬者嫌天子許之明

須赦而後得葬 惠棟九經古義云失係古佚字佚與逸同謂逸囚也

左傳杜注無傳赦有罪也易稱赦過宥罪書稱眚災肆赦傳稱肆眚圉鄭皆放赦罪人蕩滌衆故以新其心有時而用之非制所常故書疏肆緩也眚過也緩縱大過是赦有罪也大罪猶赦則小罪亦赦之猶今赦書大辟罪以下悉皆原免也此諸言肆眚者皆是放赦罪人蕩滌衆故除其瑕穢以新其心也必其國有大患非赦不解或上有嘉慶須布大恩如是乃行此事故釋例曰天有四時得以成歲雷霆以振之霜雪以齊之春陽以煖之雲雨以潤之然後能相育也天且弗違而況於人乎物不可終否故受之以同人同人者與人同也解天下之至結成天下之憂壘肆大眚之謂也堯曰咨爾舜有罪不敢赦所以須待革命有

時而用非制所常故書之也杜唯言有時用之亦不知此時何以須赦穀梁傳曰肆大眚爲嫌天子之葬也其意言文姜有罪不合以禮而葬若不赦不復書葬嫌天子許之明須赦而後得葬故爲赦也賈逵以文姜爲有罪故須赦而後葬以說臣子也魯大赦國中罪過欲令文姜之過因是得除以葬文姜杜不明說要文姜出奔之日尙稱夫人夫人之名未嘗有貶何須以赦除之此赦必不爲文姜也但夫人以去年七月薨十一月則當合葬乃至此年正月經七月始葬如此遲緩必是國家有事須赦解之但不知其所由耳 胡傳肆眚者蕩滌瑕垢之稱也舜典曰眚災肆赦易於解卦曰君子以赦過宥罪呂刑曰五刑之疑有赦五罰之疑有赦周官司刺掌赦宥之法未聞肆大眚也大眚皆肆則廢天討虧國典縱有罪虐無辜惡人幸以免

矣後世有姑息爲政數行恩宥惠姦宄賊良民而其弊益滋蓋源於此故諸葛孔明曰治世以大德不以小惠其爲政於蜀軍旅數興而赦不妄下斯得春秋之旨肆眚而曰大眚譏失刑也邱濬曰按後世大赦天下其原蓋出於此夫魯所肆者一國之中而謂之眚則其所赦者過失焉耳眚而謂之大意者魯國向有所肆皆小眚也今則併其大者而肆之然於罪惡猶未赦也聖人書之以垂戒萬世以此爲坊後世赦文乃至徧赦天下已發覺未發覺已結正未結正罪無大小咸赦除之甚至十惡之罪常赦所不原者亦或赦焉惠姦宄賊良民怙終得志善良暗啞失天討之公縱人欲之私皆春秋之罪人也

按眚過也大眚云者其所肆非一人一邑蓋舉一國之中咸肆之故曰大也眚與罪惡之出于故意者不同唐

虞卽有肆赦之法春秋時亦有肆眚之事但於一人一邑行之舉一國而肆之非法也故書以譏之胡邱之說持論甚正似未得大眚之本義

左傳襄九年肆眚圍鄭注肆緩也眚過也疏肆訓爲緩緩從罪人謂放赦之也將求民力開恩赦罪赦諸侯之軍內犯法者服虔以爲放鄭囚案傳未與鄭戰無囚可放設使有囚可放鄭人以戰而獲非有所犯不得謂之肆眚也

按爾雅釋詁赦舍也郭注舍放置三蒼赦舍也與周禮鄭注合說文赦置也其義亦同謂有罪者放置之也據通考之說是古之赦者乃過失之類如司刺所言者尙無後世大赦常赦之事惟春秋之肆大眚似爲大赦之權輿管子言赦之害其相齊亦在斯時可見春秋之初已有此事但不知實起於何時耳自漢以後遂爲常法

矣

逸周書大武篇陳有七來來有三哀四赦四赦一勝人必  
羸二取威信復三人樂生身四赦民所惡 大聚篇王親  
在之資大夫免列以選赦刑以寬復亡解辱削赦輕重皆  
有數此謂行風注削削其職赦赦其罪數等差風風聲

按前條頗難解姑錄之後條言赦有等差也

賈子新書惟稽五赦以綏民中一日原心二日明信三日  
勸功四日喪化五日權計

史記秦始皇紀始皇推終始五德之傳以爲周得火德秦  
代周德從所不勝方今水德之始改年始朝賀皆自十月  
朔衣服旄旌節旗皆上黑數以六爲紀符法冠皆六寸而  
輿六尺六尺爲步乘六馬更名河曰德水以爲水德之始  
剛毅戾深事皆決於法刻削無仁恩和義然後合五德之

數於是急法久者不赦

後漢霍詡傳詡聞春秋之義原情定過赦事誅意

赦一終

赦二

刑法考

述赦一

按漢舊儀所述漢代之赦僅踐阼改元立后建儲四事  
其他之因事而赦者尙多今將漢事分類錄之

踐阼

漢書高后紀惠帝崩太子立爲皇帝年幼太后臨朝稱制  
大赦天下

按高祖於五年十二月破楚春正月以天下事畢赦天  
下迨二月甲午卽皇帝位不復赦惠帝於十二年四月  
甲辰高祖崩丁未發喪大赦天下五月丙寅惠帝卽位  
不復赦是漢初尙無踐阼赦也此太子卽位少帝也史  
不著其名班紀書赦于卽位稱制之下其爲踐阼之赦  
歟抑爲稱制之赦歟史記書赦于卽位之前似此赦非

踐阼之赦迨四年少帝廢恒山王弘爲皇帝不改元不赦

孝文紀詔曰制詔丞相太尉御史大夫間者諸呂用事擅權謀爲大逆欲危劉氏宗廟賴將相列侯宗室大臣誅之皆伏其辜朕初卽位其赦天下

按此踐阼之赦也文帝自代來故赦以安人心踐阼赦當始此迨文帝於後七年六月崩景帝卽位未赦其元年四月之赦距卽位之日已遠武帝於景帝後元三年正月卽位建元元年二月赦天下其相去亦遠惠帝景帝竝於葬後卽位武帝於景帝崩日卽位昭帝於次日卽位其踐阼之日亦不同

昭紀後元二年二月武帝崩戊辰太子卽皇帝位謁高廟夏六月赦天下武帝三月甲申葬茂陵

按三月葬而六月乃赦此赦在葬後者

宣紀元平元年四月昭帝崩無嗣大將軍霍光請皇后徵昌邑王六月丙寅王受皇帝璽綬尊皇后曰皇太后癸巳光奏王賀淫亂請廢秋七月光奏議曰孝武皇帝會孫病已有詔掖庭養視至今年十八師受詩論語孝經操行節儉慈仁愛人可以嗣孝昭皇帝後奉承祖宗子萬姓奏可遣宗正德至曾孫尙冠里舍洗沐賜御府衣太僕以輪獵車奉迎會孫就齊宗正府庚申入未央宮見皇太后封爲陽武侯已而羣臣奏上璽綬卽皇帝位謁高廟九月大赦天下

按昭帝於六月壬申葬昌邑王於丙寅受皇帝璽綬在葬之先也宣帝卽位始赦故在葬後

元紀黃龍元年十二月宣帝崩癸巳太子卽皇帝位初元

二年春正月辛丑孝宣皇帝葬杜陵大赦天下

按此卽位在葬前而赦在葬後

成紀竟寧元年五月元帝崩六月己未太子卽皇帝位七月大赦天下 元紀秋七月丙戌葬渭陵

按此卽位在葬前赦與葬同月而無日不詳其先後

哀紀綏和二年三月成帝崩四月丙午太子卽皇帝位大赦天下 成紀四月己卯葬延陵

平紀元壽二年六月哀帝崩秋七月遣車騎將軍王舜大鴻臚左咸使持節迎中山王九月辛酉中山王卽皇帝位大赦天下 哀紀秋九月壬寅葬義陵

按哀平二帝卽位及赦並在葬前

後漢書光武紀建武元年六月己未卽皇帝位於是改元爲建武大赦天下

明紀中元二年二月戊戌卽皇帝位三月丁丑葬光武皇帝於原陵夏四月丙辰詔曰予末小子奉承聖業夙夜震畏不敢荒甯先帝受命中興德侔帝王協和萬邦假於上下懷柔百神惠於鰥寡朕承大運繼體守文不知稼穡之艱難懼有廢失聖恩遺戒顧重天下以元元爲首公卿百僚將何以輔朕不逮其賜天下男子爵人二級三老孝弟力田人三級爵過公乘得移與子若同產同產子及流人無名數欲自占者人一級鰥寡孤獨篤癯粟人十斛其施刑及郡國徒在中元二年四月己卯赦前所犯而後捕繫者悉免其刑又邊人遭亂爲內郡人妻在己卯赦前一切遣還邊恣其所樂中二千石下至黃綬貶秩贖論者悉皆復秩還贖

章紀永平十八年八月壬子卽皇帝位壬戌葬孝明皇帝

千顯節陵冬十月丁未大赦天下

按和帝卽位之年無赦

殤紀元興元年十二月辛未夜卽皇帝位尊皇后曰皇太后太后臨朝延平元年三月甲申葬孝和皇帝于慎陵五月辛卯皇太后詔曰皇帝幼冲承統鴻業朕且權佐助聽政兢兢寅畏不知所濟深惟至治之本道化在前刑罰在後將稽中和廣施慶惠與吏民更始其大赦天下自建武以來諸犯禁錮詔書雖解有司持重多不奉行其皆復爲平恩

長太后臨朝大赦用太后詔與呂后之事殆不殊矣安紀延平元年八月殤帝崩太后與兄車騎將軍鄧禹定策禁中其夜使隲持節以王青蓋車迎帝齋于殿中皇太后御崇德殿百官皆吉服羣臣陪位引拜帝爲長安侯皇

太后詔以祐爲孝和皇帝嗣讀策畢太尉奉上璽綬卽皇帝位年十三太后猶臨朝永初元年春正月癸酉朔大赦天下

安紀延光四年三月丁卯幸葉帝崩于乘輿庚午還宮辛未夕乃發喪尊皇后爲皇太后太后臨朝立章帝孫濟北惠王壽子北鄉侯懿乙酉北鄉侯卽帝位四月己酉葬孝安皇帝于恭陵六月乙巳大赦天下

順紀永甯元年立爲皇太子延光三年廢爲濟陰王明年三月安帝崩北鄉侯立濟陰以廢黜不得上殿及北鄉侯薨十一月丁巳是夜中黃門孫程等十九人共斬江京劉安陳達等迎濟陰王於德陽殿西鐘下卽皇帝位年十一永建元年春正月甲寅詔曰先帝聖德享祚未永早弃鴻烈姦慝緣間人庶怨讎上干和氣疫癘爲災朕奉承大業

未能甯濟蓋至理之本稽宏德惠蕩滌宿惡與人更始其  
大赦天下賜男子爵人二級爲父後三老孝悌力田三級  
流民欲自占者一級鰥寡孤獨篤癯貧不能自存者粟人  
五斛貞婦帛人三匹坐法當徙勿徙亡徒當傳勿傳徒囚  
當傳捕者  
放之勿捕宗室以罪絕皆復屬籍其與閭顯江京等交通  
者悉勿考勉修厥職以康我民

按沖帝卽位無赦

質紀沖帝不豫大將軍梁冀徵帝到洛陽都亭及沖帝崩  
皇太后與冀定策禁中丙辰使冀持節以王青蓋車迎帝  
入南宮丁巳封爲建平侯其日卽皇帝位年八歲己未葬  
孝沖皇帝于懷陵二月乙酉大赦天下

桓紀本初元年梁太后徵帝到夏門亭會冀帝崩太后遂  
與兄大將軍冀定策禁中閏月庚寅使冀持節以王青蓋

車迎帝入南宮其日卽皇帝位時年十五太后猶臨朝政  
秋七月乙卯葬孝質皇帝于靜陵建和元年春正月戊午  
大赦天下

靈紀桓帝崩無子皇太后與父城門校尉竇武定策禁中  
使守光祿大夫劉儵持節將左右羽林至河間奉迎建甯  
元年春正月己亥帝到夏門亭使竇武持節以王青蓋車  
迎入殿中庚子卽皇帝位年十二改元建寧二月辛酉葬  
孝桓皇帝于宣陵庚午謁高廟辛未謁世祖廟大赦天下  
中平六年四月丙辰帝崩戊午皇子辯卽皇帝位尊皇后  
曰皇太后太后臨朝大赦天下六月辛酉葬孝靈皇帝于  
文陵

按東京諸帝皆先葬而後赦此獨先赦而後葬

獻紀中平六年四月少帝卽位封帝爲勃海王徙封陳留

王九月甲戌卽皇帝位年九歲大赦天下

蜀志先主傳建安二十五年魏文帝稱尊號改年曰黃初  
或傳聞漢帝見害先主乃發喪制服追謚曰孝愍皇帝太  
傳許靖云云臣等謹與博士許慈議郎孟光建立禮儀擇  
令辰上尊號卽皇帝位於成都武擔之南章武元年夏四  
月大赦改元

後主傳章武三年四月先主殂于永安宮五月後主襲位  
于成都大赦改元

按赦非古法漢初高景武三帝皆無赦惠帝但恩及於  
親貴老小未大赦其有赦者必有故文以自代來昭以  
霍光秉政宣以曾孫入嗣大統皆事出非常赦以靖人  
心也元成以後踵而行之東京亦承其制惟和沖二帝  
卽位無赦和紀疑史之闕文沖帝于八月卽位次年正

月卽崩蓋未及赦也

改元

景紀中元年夏四月赦天下 後元年三月赦天下

接文帝改後元年不赦改元之赦當自景帝始

武紀建元元年春二月赦天下 元光元年夏四月赦天

下復七國宗室前絕屬者 元朔元年春三月甲子立皇

后衛氏詔曰朕聞天地不變不成施化陰陽不變物不暢

茂易曰通其變使民不倦詩云九變復貫知言之選朕嘉

唐虞而樂殷周據舊以鑒新其赦天下與民更始諸逋負

及辭訟在孝景後三年以前皆勿聽治 元狩元年夏四

月赦天下丁卯立皇太子 元鼎元年夏五月赦天下

元封元年太初元年皆不赦 天漢元年夏五月赦天下

太始元年夏六月赦天下 征和元年不赦 後元元年春

二月詔曰朕郊見上帝巡于北邊見羣鶴留止以不羅網靡所獲獻薦于泰時光景竝見其赦天下

按武帝卽位無赦而改元赦其後十改元三無赦

昭紀始元元年秋七月赦天下 元鳳元年夏六月赦天

下 元平元年不赦

按昭帝卽位赦改元又赦其後二改元一無赦蓋帝崩于夏四月未及赦也

宣紀本始元年五月鳳皇集膠東千乘赦天下 地節元

年夏六月詔曰蓋聞堯親九族以和萬國朕蒙遺德奉承聖業惟念宗室屬未盡而以罪絕若有賢材改行勸善其復屬使得自新 元康元年三月詔曰迺者鳳皇集泰山陳留甘露降未央宮朕未能章先帝休烈協寧百姓承天順地調序四時獲蒙嘉瑞賜茲祉福夙夜兢兢靡有驕色

內省匪解永惟罔極書不云乎鳳皇來儀庶尹允諧其赦天下徒賜勤事吏中二千石以下至六百石爵自中郎更至五大夫佐史以上二級民一級女子百戶牛酒加賜鰥寡孤獨三老孝弟力田帛所振貸勿收神爵元年赦在黃龍元年皆不五鳳元年夏赦徒作杜陵者甘露元年黃龍元年皆不按宣帝卽位赦改元又赦以鳳皇集也其後六改元惟一赦天下徒而已其一赦杜陵徒一復宗室屬籍餘三無赦

元紀永光元年三月詔曰五帝三王任賢使能以登至平而今不治者豈斯民異哉咎在朕之不明亡以知賢也是故壬人在位而吉士雍蔽重以周秦之弊民漸薄俗去禮義觸刑法豈不哀哉繇此觀之元元何辜其赦天下令厲精自新各務農畝無田者皆假之貸種食如貧民師古曰此皆謂

遇赦新免罪者賜更六百石以上爵五大夫勤事吏二級也故云如貧民一級女子百戶牛酒鰥寡孤獨高年帛建

昭元年

竟寧元年

皆不赦

按元帝即位改元赦其後三改元二不赦而改元之先後年頻有赦是當時之赦不拘于改元之年也

成紀建始元年二月大赦天下

以火災也

河平元年四月大

赦天下

以日蝕也

陽朔元年三月赦天下

鴻嘉元年有詔舉免

獄不赦

二月壬午行幸初陵赦作徒

永始元年六月丙寅

立皇后趙氏大赦天下

元延元年夏四月丁酉赦天下

以災異也

綏和元年春正月大赦天下

按成帝即位赦改元又赦以災異也其後六改元五赦一立后二災異不專以改元一但舉冤獄而不赦

哀紀建平元年春正月赦天下

二年六月待詔夏賀良

等言赤精子之讖漢室歷運中衰當再受命宜改元易號  
詔曰漢興二百載歷數開元皇天降非材之佑漢國再獲  
受命之符朕之不德曷敢不通夫基事之元命必與天下  
自新其大赦天下以建平二年爲太初元將元年號曰陳  
聖劉太平皇帝漏刻以百二十爲度八月詔曰待詔夏賀  
良等建言改元易號增益漏刻可以永安國家朕過聽賀  
良等言冀爲海內獲福卒亡嘉應皆違經背古不合時宜  
六月甲子制書非赦令也皆蠲除之賀良等反道惑衆下  
有司皆伏辜 元壽元年春正月大赦天下以日蝕也  
詳災異

按哀帝卽位赦改元又赦其一改元亦赦以災異也建  
平二年已改元大赦又蠲除矣平帝未改元

光武紀中元元年夏四月己卯大赦天下

是時封禪還宮

按光武卽位改元後一改元赦明帝未改元

章紀元和元年八月癸酉詔曰朕道化不德吏政失和元  
元未諭抵罪於下寇賊爭心不息邊野邑屋不修永惟庶  
事思稽厥衷與凡百君子共宏斯道中心悠悠將何以寄  
其改建初九年爲元和元年郡國中都官繫囚減死一等  
勿笞詣邊縣妻子自隨占著在所其犯殊死一切募下贖  
室其女子宮繫囚鬼薪白粲以上皆減本罪一等輸司寇  
作亡命者贖各有差 章和元年夏四月丙子令郡國中  
都官繫囚減死一等詣金城戍秋七月壬戌詔曰朕聞明  
德之君啟迪鴻化緝熙康乂光照六幽訖惟人面靡不率  
俾仁風翔于海表威霆行乎鬼區然後敬恭明祀膺五福  
之慶獲來儀之貺朕以不德受祖宗宏烈乃者鳳皇仍集  
麒麟竝臻甘露宵降嘉穀滋生芝草之類歲月不絕朕夙  
夜祗畏上天無以彰于先功今改元和四年爲章和元年

秋令是月養衰老授几杖行糜粥飲食其賜高年二人共布帛各一匹以爲醴酪死罪囚犯法在丙子赦前而後捕繫者皆減死勿笞詣金城戍

按章帝卽位改元後二改元皆赦

和紀元興元年夏四月庚午大赦天下改元元興宗室以罪絕者悉復屬籍

按和帝卽位改元後一改元赦殤帝在位未一年

安紀元和元年夏四月丁酉大赦天下 永寧元年夏四月丙寅立皇子保爲皇太子改元永寧大赦天下 建光元年秋七月己卯改元建光大赦天下 延光元年三月丙午改元延光大赦天下還徙者

按安帝卽位改元後四改元皆赦

順帝陽嘉元年三月庚寅大赦天下改元陽嘉詔宗室絕

屬籍者一切復籍 永和元年春正月己巳改元永和  
大赦天下 漢安元年春正月癸巳大赦天下改元漢安  
建康元年夏四月辛巳立皇子炳爲皇太子改年建康大  
赦天下

按順帝卽位改元後四改元皆赦沖帝在位未一年質  
帝在位未二年

桓紀和平元年春正月甲子大赦天下改元和平 元嘉  
元年春正月癸酉大赦天下改元元嘉 永興元年夏五  
月丙申大赦天下改元永興 永壽元年春正月戊申大  
赦天下改元永壽 延熹元年六月戊寅大赦天下改元  
延熹 永康元年六月庚申大赦天下悉除黨錮改元永  
康時李膺等頗引宦官子弟宦官多懼請  
帝以天時當赦帝許之故除黨錮也

按桓帝卽位改元後六改元皆赦

靈紀熹平元年夏五月己巳大赦天下改元熹平 光和  
元年三月辛丑大赦天下改元光和 中平元年十二月  
己巳大赦天下改元中平

按靈帝卽位改元後三改元皆赦少帝改元光熹又改  
昭寧皆未赦

獻帝初平元年春正月辛亥大赦天下 興平元年春正  
月辛酉大赦天下改元興平 建安元年春正月癸酉大  
赦天下改元建安 二十五年三月改元延康

按獻帝卽位大赦改元又赦其後三改元其二赦延康  
未一年而漢祚移矣

蜀志後主傳延熙元年春正月立皇后張氏大赦改元  
景耀元年史官言景星見於是大赦改元 六年夏大赦  
改元爲炎興

按改元之事始于文而改元之赦始于景其後踵而行  
之然武之元封太初征和昭之元平宣之地節神爵五  
鳳甘露黃龍元之建昭竟寧成之鴻嘉皆無赦也是西  
京時尙未著爲常法東京則凡改元無不赦者蜀漢承  
之

立后

高祖五年尊王后曰皇后

未赦

惠紀四年冬十月壬寅立皇后張氏

未赦

文紀元年三月有司請立皇后皇太后曰立太子母竇氏  
爲皇后

未赦

景紀七年夏四月乙巳立皇后王氏

未赦

武紀元朔元年春三月甲子立皇后衛氏赦天下

詳改元

按此年之赦係于立后之下立后之赦當始于是惟其

文云與民更始似是改元之意今兩繫之

昭紀始元四年春三月甲寅立皇后上官氏赦天下辭訟  
在後二年前皆勿聽治

宣紀元平元年十一月壬子立皇后許氏 本始四年三  
月乙卯立皇后霍氏赦天下 元康二年二月乙丑立皇  
后王氏

按宣帝三后霍氏有赦而許王無赦者事在赦後故不  
復赦也

元紀初元元年三月丙午立皇后王氏

赦後未赦

成紀建始二年三月丙午立皇后許氏

未赦

永始元年立

皇后趙氏大赦天下

詳改元兩繫

哀紀五月丙戌立皇后傅氏

赦後未赦

平紀元始四年二月丁未立皇后王氏大赦天下

光武紀建武二年六月戊戌立貴人郭氏爲皇后子彊爲皇太子大赦天下 十七年冬十月辛巳廢皇后郭氏爲中山太后立貴人陰氏爲皇后未赦

按郭后之立大赦而陰后未赦其時制詔曰異常之事非國休福不得上壽稱慶則其未赦蓋以此也自後立后自明訖桓無書赦者靈帝宋后紀不書赦而續漢書禮儀志劉昭注引蔡質所記立宋皇后儀言后卽位大赦天下質乃靈帝時人記當時事必不誤疑范紀疏漏也蜀先主之立吳后及後主之先立張氏並未赦其後立張后則大赦其時武侯已沒故赦典復行

後主傳建興元年立皇后張氏十五年夏六月皇后張氏薨延熙元年春正月立皇后張氏大赦改元立子璿爲皇太子

按東京自建武十七年陰后之立未赦其後諸帝皆不赦豈漢舊儀所言乃西京之制歟抑范紀有缺文歟

建儲

高紀二年六月壬午立太子赦罪人

按建儲之赦始此惠帝張后無子呂氏取後宮美人子名之以爲太子惠紀不言見高后紀殆其事甚祕也

文紀元年正月有司請蚤建太子云云子啟最長敦厚慈仁請建以爲太子上乃許之

按文帝立太子未赦

景紀四年夏四月己巳立皇子榮爲皇太子六月赦天下賜民爵一級七年春正月廢皇太子榮爲臨江王夏四月丁巳立膠東王徹爲皇太子賜民爲父後者爵一級

按此又未赦

武紀元狩元年十一月淮南王安衡山王賜謀反誅黨與死者數萬人夏四月赦天下丁卯立皇太子賜中二千石爵右庶長民爲父後者一級詔曰朕聞咎繇對禹曰在知人知人則哲惟帝難之蓋君者心也民猶支體支體傷則心潛怛曰者淮南衡山修文學流貨賂兩國接壤怵於邪說而造篡弑此朕之不德詩云憂憂慘慘念國之爲虐已赦天下滌除與之更始朕嘉孝弟力田哀夫老眊孤寡鰥獨或匱於衣食甚憐愍焉其遺謁者巡行天下存問致賜曰皇帝使謁者賜縣三老孝者帛人五匹鄉三老弟者力田帛人三匹年九十以上及鰥寡孤獨帛人二匹絮三斤八十以上米人三石有免失職使者以問縣鄉卽賜毋贅聚

接赦與立皇太子相連而書似是先赦後立者以詔語

觀之又似爲二王謀反而赦姑繫于此迨據自殺而昭  
帝立爲太子則未赦

宣紀地節二年夏四月戊申立皇太子大赦天下賜御史  
大夫爵關內侯中二千石爵右庶長天下當爲父後者爵  
一級賜廣陵王黃金千斤諸侯十五人黃金各百斤列侯  
在國者八十七人黃金各二十斤

元紀初元二年夏四月丁巳立皇太子賜御史大夫爵關  
內侯中二千石爵右庶長天下當爲父後者爵一級列侯  
錢各二十萬五大夫十萬

按元帝立太子未赦是建儲之赦亦不以爲常自後成  
哀皆無子平又短祚西京之運終矣

光武紀建武二年六月戊戌立貴人郭氏爲皇后子彊爲  
皇太子大赦天下

按後疆廢立東海王陽爲皇太子未赦詳立后

明紀永平三年二月甲子立皇子炆爲皇太子賜天下男子爵人二級三老孝弟力田人三級流人無名數欲占者人一級鰥寡孤獨篤癡貧不能自存者粟人五斛

章紀建初三年夏四月戊子立皇子慶爲皇太子賜爵人二級三老孝悌力田人三級民無名數及流人欲自占者人一級鰥寡孤獨篤癡貧不能自存者粟人五斛七年廢皇子慶爲清河王立皇子肇爲皇太子

和紀元興元年冬十二月辛未帝崩于章德前殿年二十七立子隆爲皇太子賜天下男子爵人云云同永平三年安紀永寧元年夏四月丙寅立皇子保爲皇太子改元永寧大赦天下延光三年廢皇太子保爲濟陰王

順紀建康元年夏四月辛巳立皇子炳爲皇太子改年建

康大赦天下

按冲質短祚桓帝無子靈帝有子而未立也

蜀志先主傳章武元年五月立子禪爲皇太子

後主傳延熙元年春正月立皇后張氏大赦改元立子璿爲太子

按東京建儲有赦有不赦續漢書禮儀志言拜皇太子

大赦天下豈當時不盡遵用歟抑范紀之疏也

后臨朝

以下漢舊儀所不及者

呂后臨朝稱制

鄧后臨朝

本詳踐阼

大喪

高紀十年秋七月癸卯太上皇崩葬萬年赦櫟陽囚死罪

以下

臣瓚曰萬年陵在櫟陽縣界故特赦之

按此廣太上皇之恩也

十二年夏四月甲辰帝崩于長樂宮呂后與審食其謀曰  
云云乃以丁未發喪大赦天下

高后紀八年秋七月辛巳皇太后崩于未央宮遺詔賜諸  
侯王各千金將相列侯下至郎吏各有差大赦天下

平紀元始五年冬十二月丙午帝崩于未央宮大赦天下

### 帝冠

惠紀四年三月甲子皇帝冠赦天下

昭紀元鳳四年春正月丁亥帝加元服見于高廟注如淳  
曰元服謂初冠加上服也師古曰如瓜以爲衣服之服此  
說非也元首也冠者首之所著故曰元服其下汲黯傳序  
云上正元服是知謂冠爲元服

按昭帝加元服但有恩賜無赦

和紀永元三年春正月甲子皇帝加元服

元首也謂加冠於首賜諸

侯王公將軍特進中二千石列侯宗室子孫在京師奉朝請者黃金將大夫郎吏從官帛賜民爵及粟帛各有差大酺五日郡國中都官繫囚死罪贖縑至司寇及亡命各首安紀永初三年皇帝加元服元服謂加冠也土冠禮曰令月吉辰加爾元服鄭元云元也大救天下

順紀永建四年春正月丙寅詔曰朕託王公之上涉道日寡政失厥中陰陽氣隔寇盜肆暴庶獄彌繁憂悴永歎疚如疾首詩云君子如祉亂庶遄已三朝之會朔旦立春嘉與海內洗心自新其赦天下從甲寅赦令已來復秩屬籍三年正月已來還贖其閭顯江京等知識婚姻禁錮一原除之務崇寬和敬順時令遵典去苛以稱朕意丙子帝加元服

按此先赦而後冠丙寅丙子相去十日

桓紀建和二年春正月甲子皇帝加元服庚午大赦天下  
靈紀建寧四年春正月甲子帝加元服大赦天下

郊后土  
附

文紀十五年夏四月上幸雍始郊見五帝赦天下

按此文帝惑於公孫臣新垣平之說而有此赦也十六  
年夏四月又郊則不赦迨至趙宋之世凡郊必赦則惑  
之甚者矣

武紀元鼎五年十一月辛巳朔旦冬至立泰畤于甘泉天  
子親郊見朝日夕月夏四月赦天下 天漢元年春正月

行幸甘泉郊泰畤三月行幸河東祠后土夏五月赦天下

互詳  
改元

後元元年春正月行幸甘泉郊泰畤遂幸安定二月赦天

下互詳  
改元

元紀初元四年三月行幸河東祠后土赦汾陰徒 永光  
元年春正月行幸甘泉郊泰時赦雲陽徒 建昭二年春  
正月行幸甘泉郊泰時夏四月赦天下

按泰時立于武帝元鼎五年其年始郊赦其後泰時之  
郊皆赦至宣帝神爵元五鳳元甘露元三元帝永光五  
成帝元延三四綏和二等年郊泰時未赦

成紀建始二年春正月罷雍五時辛巳上始郊祀長安南  
郊詔曰迺者徙泰時后土于南郊北郊朕親飭躬郊祀上  
帝皇天報應神光竝見三輔長無共張繇役之勞赦奉郊  
縣長安長陵及中都官耐罪徒減天下賦錢算四十 永  
始四年春正月行幸甘泉郊泰時神光降集紫殿大赦天  
下

按既已徙泰時后土于南北郊又郊泰時何也

獻紀建安元年春正月癸酉郊祀上帝於安邑大赦天下  
改元建安互見秋七月丁丑郊祀上帝大赦天下

按一歲二郊非禮也亂世之政令如此

### 祀明堂

明紀永平二年春正月辛未宗祀光武皇帝於明堂帝及  
公卿列侯始服冠冕衣裳玉佩絢履以行事禮畢登靈臺  
使尙書令持節詔驃騎將軍三公曰今令月吉日宗祀光  
武皇帝於明堂以配五帝禮備法物樂和八音詠祉福舞  
功德其班時令勅羣后事畢升靈臺望元氣吹時律觀物  
變羣僚藩輔宗室子孫衆郡奉計百蠻貢職烏桓濊貊咸  
來助祭單于侍子骨都侯亦皆陪位斯固聖祖功德之所  
致也朕以閭陋奉承大業親執圭璧恭祀天地仰惟先帝  
受命中興撥亂反正以甯天下封泰山建明堂立辟雍起

靈臺恢宏大道被之八極而胤子無成康之質羣臣無呂  
旦之謀盟洗進爵踞踏惟慙素性頑鄙臨事益懼故君子  
坦蕩蕩小人長戚戚其令天下自殊死已下謀反大逆皆  
赦除之百僚師尹其勉修厥職順行時令敬若昊天以綏  
兆人

章紀建初三年春正月己酉宗祀明堂禮畢登靈臺望雲  
物大赦天下

元和二年二月丙辰東巡狩辛未幸大山柴告岱宗有黃  
鶴三十從西南來經祠壇上東北過于宮屋翺翔升降進  
幸奉高壬申宗祀五帝于汶上明堂癸酉告祠二祖四宗  
大會外內羣臣丙子詔曰朕巡狩岱宗柴望山川告祠明  
堂以章先勳其二王之後先聖之胤東后蕃衛伯父伯兄  
仲叔季弟幼子童孫百僚從臣宗室衆子要荒四裔沙漠

之北蔥嶺之西冒彫之類跋涉懸度陵踐阻絕駿奔郊時  
咸來助祭祖功宗德延及朕躬予一人空虛多疚纂承尊  
明盥洗享薦慙愧祇慄詩不云乎君子如祉亂庶遄已歷  
數既從靈耀著明亦欲與士大夫同心自新其大赦天下  
諸犯罪不當得赦者皆除之復博奉高贏無出今年田租  
芻藁

和紀永元五年春正月乙亥宗祀五帝於明堂遂登靈臺  
望雲物大赦天下

按武帝元封五年三月甲子祠高祖于明堂以配上帝  
未赦太始三月壬午祀高祖于明堂以配上帝癸未祀  
孝景皇帝于明堂赦以修封也東京祀明堂始赦

臨雍

明紀永平八年冬十月丙子臨辟雍養三老王更禮畢詔

三公募郡國中都官死罪繫囚減辜一等勿笞詣度遼將軍營屯朔方五原之邊縣妻子自隨便占著邊縣父母同產欲相代者悉聽之其大逆無道殊死者一切募下蠶室亡命者令贖罪各有差凡徙者賜弓弩衣糧

按二年冬幸辟雍其年祀明堂先已赦

和紀永元十四年三月戊辰臨辟雍饗射大赦天下

### 封禪

武紀元封五年春三月還至泰山增封甲子祠高祖于明堂以配上帝因朝諸侯王列侯受郡國計夏四月詔曰朕巡荆揚輯江淮物會大海氣以合泰山上天見象增修封禪其赦天下

按武帝元封元年封泰山禋梁父改元而未赦此增封則赦太初三年修封未赦

天漢三年三月行幸泰山修封祀明堂因受計還幸北地  
祠常山瘞元玉夏四月赦天下

太始四年春三月行幸泰山壬午祀高祖于明堂以配上  
帝因受計癸未祀孝景皇帝于明堂甲申增封禪石閭夏  
四月幸不其祠神人于交門宮若有鄉坐拜者作交門之  
歌夏五月還幸建章宮大置酒赦天下

按征和四年幸泰山修封未赦

光武紀中元元年春正月丁卯東巡狩二月己卯幸魯進  
幸太山辛卯柴望岱宗登封太山甲午禪于梁父夏四月  
癸酉車駕還宮己卯大赦

立廟

光武紀三年春正月辛巳立皇考南頓君已上四廟壬午  
大赦天下

巡狩

武紀元封二年冬十月行幸雍祠五時春幸緱氏遂至東萊夏四月還祠泰山至瓠子臨決河合從臣將軍以下皆負薪塞河隄作瓠子歌赦所過徒賜孤獨高年米人四石明紀永平十五年春二月庚子東巡狩辛丑幸偃師詔亡命白雉死已下贖死罪縑四十匹右趾至髡鉗城旦春十匹完城旦至司寇五匹犯罪未發覺詔書到日自告者半人贖徵沛王輔會睢陽進幸彭城癸亥帝耕于下邳三月徵琅邪王京會良成徵東平王蒼會陽都又徵廣陵侯及其三弟會魯祠東海恭王陵還幸孔子宅祠仲尼及七十二弟子親御講堂會皇太子諸王說經又幸東平辛卯進幸大梁至定陶祠定陶恭王陵夏四月庚子車駕還宮乙巳大赦天下其謀反大逆及諸不應宥者皆赦除之

章紀建初七年九月甲戌幸偃師東涉卷津至河內遂覽  
淇園已西進幸鄴勞饗魏郡守令已下至于三老門闌走  
卒賜錢各有差勞賜常山趙國吏人復元氏租賦三歲辛  
卯車駕還宮詔天下繫囚減死一等勿笞詣邊戍妻子自  
隨占著所在父母同產欲相從者悉聽之有不到者皆以  
乏軍興論軍興而致闕及犯殊死一切募下蠶室其女子  
宮繫囚鬼薪白粲已上皆減本罪各一等輸司寇作亡命  
贖死罪入縑二十匹右趾至髡鉗城旦舂十匹完城旦至  
司寇三匹吏人有罪未發覺詔書到自告者半入贖章  
和元年八月癸酉西南巡狩甲申徵任城王尙會唯陽戊子  
辛梁乙未幸沛徵會東海王政九月庚子幸彭城東海王  
政沛王定任城王尙皆從辛亥幸壽春壬子詔郡國中都  
官繫囚減死罪一等詣金城戍犯殊死者一切募下蠶室

其女子宮繫囚鬼薪白粲已上減罪一等輪司寇作亡命者贖死罪縲二十四匹右趾至髡鉗城旦春七匹完城旦至司寇三匹吏民犯罪未發覺詔書到自告者半入贖已未幸汝陰冬十月丙子車駕還宮

徙宮

昭紀元鳳二年夏四月上自建章宮徙未央宮大置酒賜郎從官帛及宗室子錢人二十萬吏民獻牛酒者賜帛人一匹六月赦天下

定都

高紀五年戊卒婁敬求見說上曰陛下取天下與周異而都雒陽不如入關據秦之固上不便以問張良良因勸上是日車駕西都長安拜婁敬爲奉春君賜姓劉氏六月壬辰大赦天下

從軍

史記秦二世紀二年冬陳涉所遣周章等將西至戲兵數十萬二世大驚少府章邯曰盜已至衆彊今發近縣不及矣鄠山徒多請赦之授兵以擊之二世乃大赦天下使章邯將擊破周章軍而走

按秦無赦此不得已而大赦秦并天下至於亡凡十五年惟此一赦耳今附列于此

高紀十一年秋七月淮南王布反上赦天下死罪以下皆令從軍

武紀元封六年益州昆明反赦京師亡命令從軍

明紀永平八年冬十月詔三公募郡國中都官死罪繫囚減辜一等詣度遼將軍營屯朔方五原之邊縣

按是年春復置度遼將軍屯五原曼柏至冬臨雍禮畢

送赦死罪以從軍也其文云妻子自隨便占著邊縣又為實邊計矣九年春又詔郡國死罪囚減罪與妻子詣五原朔方占著所在似又專為移民計故不言屯

十六年九月丁卯詔令郡國中都官死罪繫囚減死罪一等詣軍營屯朔方敦煌

十七年秋八月丙寅令武威張掖酒泉敦煌及張掖屬國繫囚右趾已下任兵者皆一切勿治其罪詣軍營

章紀建初七年詔天下繫囚減死一等詣邊戍詳巡狩

按元和元年郡國中都官繫囚減死一等勿答詣邊縣不言屯戍

章和元年四月令郡國中都官繫囚減死一等詣金城戍七月詔死罪囚犯法在丙子赦前而後捕繫者皆減死詣金城戍九月詔郡國中都官繫囚減死罪一等詣金城

成以上誦曠及巡狩

和紀永元元年冬十月令郡國弛刑輸作軍營 八年八月詔郡國中都官繫囚減死一等詣敦煌戍

安紀元初二年冬十月遣中郎將任尙屯三輔詔郡國中都官繫囚減死一等勿笞詣馮翊扶風屯 延光三年乙巳詔郡國中都官死辜繫囚減死一等詣敦煌隴西及度遠營

順紀永建五年冬十月丙辰詔郡國中都官死罪繫囚皆減死一等詣北地上郡安定戍

克捷

高紀二年春正月諸將拔北地虜雍王弟章平赦罪人五年春正月下令曰楚地已定云云又曰兵不得休八年萬民與苦甚今天下事畢其赦天下殊死以下

六年冬十月人告楚王信謀反上問左右左右爭欲擊之  
用陳平計乃偽游雲夢十二月會諸侯于陳楚王信迎謁  
因執之詔曰天下既安豪傑有功者封侯新立未能盡圖  
其功身居軍九年或未習法令或以其故犯法大者死刑  
吾甚憐之其赦天下

十年九月代相國陳豨反上自東至邯鄲 十一年冬大  
尉周勃道太原入定代地將軍柴武斬韓信於參合上還  
雒陽大赦天下

武紀元朔六年春二月大將軍衛青將六將軍兵十餘萬  
騎出定襄斬首三千餘級還休士馬于定襄雲中雁門赦  
天下

元紀建昭四年春正月以詠郵支單于告祠郊廟赦天下

年豐

明紀永平十年夏四月戊子詔曰昔歲五穀登衍今茲蠶麥善收其大赦天下方盛夏長養之時蕩滌宿惡以報農功百姓勉務桑稼以備災害吏敬厥職無令愆愆

祥瑞

武紀元封二年六月詔曰甘泉宮內中產芝九莖連葉上帝博臨不異下房賜朕宏休其赦天下賜雲陽都百戶牛酒作芝房之歌

四年春三月祠后土詔曰朕躬祭后土地祇見光集于靈壇一夜三燭幸中都宮殿上見光師古曰中都在大原其赦汾陰夏

陽中都死罪以下賜三縣及楊氏皆無出今年租賦

六年冬行幸回中春作首山宮應劭曰首山在上郡於其下立宮廟也文穎曰在河

東蒲坂界三月行幸河東祠后土詔曰朕禮首山昆田出珍物

化或爲黃金祭后土神光三燭其赦汾陰殊死以下

太初二年夏四月詔曰朕用事介山祭后土皆有光應文  
日介山在河東皮氏縣東南其山特立周七十里高三十里其赦汾陰安邑殊死以下  
宣紀本始元年五月鳳皇集膠東千乘赦天下  
地節二年夏四月鳳皇集魯郡羣鳥從之大赦

元康元年三月詔曰迺者鳳皇集泰山陳留甘露降未央  
宮朕未能章先帝休烈協甯百姓承天順地調序四時獲  
蒙嘉瑞賜茲祉福夙夜兢兢靡有驕色內省匪懈永惟罔  
極書不云乎鳳皇來儀庶尹允諧其赦天下徒賜勤事吏  
云云

神爵二年春二月詔曰迺者正月乙丑鳳皇甘露降集京  
師羣鳥從以萬數朕之不德屢獲天福祇事不怠其赦天  
下

四年春二月詔曰迺者鳳皇甘露降集京師嘉瑞並見修

興泰一五帝后土之祠祈爲百姓蒙祉福鸞鳳萬舉蜚覽  
翱翔集止于旁齋戒之暮神光顯著薦鬯之夕神光交錯  
或降于天或登于地或從四方來集于壇上帝嘉嚮海內  
承福其赦天下

五鳳三年三月行幸河東祠后土詔曰往者匈奴數爲邊  
寇百姓被其害朕承至尊未能綏安匈奴虛閭權渠單于  
請求和親病死右賢王屠耆堂代立骨肉大臣立虛閭權  
渠子爲呼邪單于擊殺屠耆堂諸王竝自立分爲五單于  
更相攻擊死者以萬數畜產大耗什入九人民飢餓相燔  
燒以求食因大乖亂單于闕氏子孫昆弟及呼邀累單于  
名王右伊秩訾且渠當戶以下將衆五萬餘人來降歸義  
單于稱臣使弟奉珍朝賀正月北邊晏然靡有兵革之事  
朕飭躬齋戒郊上帝祠后土神光竝見或興于谷燭耀齋

宮十有餘刻甘露降神爵集已詔有司告祠上帝宗廟三月辛丑鸞鳳又集長樂宮東闕中樹上飛下止地文章五色留十餘刻吏民竝觀朕之不敏懼不能任婁蒙嘉瑞獲茲祉福書不云乎雖休勿休祗事不忘公卿大夫其助焉減天下口錢赦殊死以下云云

甘露二年春正月詔曰迺者鳳皇甘露降集黃龍登興醴泉滂流枯槁榮茂神光竝見咸受禎祥其赦天下

按宣帝在位凡十赦卽位立后建儲各一而祥瑞居其六焉蓋自卽位之始卽以鳳集赦天下而天下喻其風指此祥瑞之所以史不絕書也夫赦非善政況以祥瑞而赦宣帝爲西京合主而其惑也如其尙有封禪之侈心乎

明紀永平十七年春正月甘露降於甘陵是歲甘露仍降

樹枝內附芝草生殿前神雀五色翔集京師西南夷哀牢  
儋耳僬僥檠木白狼動黏諸種前後慕義貢獻西域諸國  
遣子入侍夏五月戊子公卿百官以帝威德懷遠祥物顯  
應迺竝集朝堂奉觴上壽制曰天生神物以應王者遠人  
慕化實繇有德朕以虛薄何以享斯惟高祖光武聖德所  
被不敢有辭其敬舉觴太常擇吉日策告宗廟其賜天下  
男子爵人二級三老孝悌力田人三級流人無名數欲占  
者人一級鰥寡孤獨篤癯貧不能自存者粟人三斛郎從  
官視事十歲以上者帛十匹中二千石二千石下至黃綬  
貶秩奉贖在去年已來皆還贖八月丙寅令武威張掖酒  
泉敦煌及張掖屬國繫囚右趾已下任兵者皆一切勿治  
其罪詣軍營

安紀延光三年四月壬戌沛國言甘露降豐縣六月辛未

扶風言白鹿見雍秋七月馮翊言甘露降潁陽衙潁川上  
言木連理白鹿麒麟見陽翟八月戊子潁川上言麒麟一  
白虎二見陽翟九月乙巳詔郡國中都官死辜繫囚減罪  
一等詣敦煌隴西及度遼營其右趾已下及亡命者贖各  
有差

桓紀建和元年十一月濟陰言有五色大鳥見于己氏戊  
午滅天下死罪一等戍邊注續漢志曰時以爲鳳皇政既  
衰缺梁冀專權皆羽孽也已氏縣名

蜀主後主傳景耀元年史官言景星見於是大赦改元宦  
人黃皓始專政

按說者每言蜀無史官觀此紀文非無史官也獨此史  
官何人妄陳祥瑞乃改元後僅歷六祀而蜀卽亡祥瑞  
云乎哉

災異

文紀後四年夏四月丙寅晦日有蝕之五月赦天下免官  
奴婢爲庶人高后紀六年春星晝見夏四月赦天下

武紀元光四年夏四月隕霜殺草五月地震赦天下 元  
狩三年春有星孛于東方夏五月赦天下

昭紀元鳳四年五月丁丑孝文廟正殿火上及羣臣皆素  
服發中二千石將五校作治六日成六月赦天下

宣紀本始四年夏四月壬寅郡國四十九地震或山崩水  
出詔曰蓋災異者天地之戒也朕承洪業奉宗廟託于士  
民之上未能和羣生迺者地震北海琅邪壞祖宗廟朕甚  
懼焉丞相御史其與列侯中二千石博問經學之士有以  
應變輔朕之不逮毋有所諱令三輔太常內郡國舉賢良  
方正各一人律令有可蠲除以安百姓條奏被地震壞敗

甚者勿收租賦大赦天下上以宗廟墮素服避正殿五日  
元紀初元二年三月詔曰蓋聞賢聖在位陰陽和風雨時  
日月光星辰靜黎庶康寧考終厥命今朕恭承天地託于  
公侯之上明不能燭德不能綏災異竝臻連年不息乃二  
月戊午地震于隴西郡毀落太上皇廟殿壁木飾壞敗獮  
道縣城郭官寺及民室屋壓殺人衆山崩地裂水泉湧出  
天惟降災震驚朕師治有大虧咎至於斯夙夜兢兢不通  
大變深惟鬱悼未知其序閒者歲數不登元元困乏不勝  
飢寒以陷刑辟朕甚閔之郡國被地動災甚者無出租賦  
赦天下有可蠲除減省以便萬姓者條奏毋有所諱丞相  
御史中二千石舉茂材異等直言極諫之士朕將親覽焉  
三年夏四月乙未晦茂陵白鶴館災詔曰迺者火災降於  
孝武園館朕戰栗恐懼不燭變異咎在朕躬羣司又未肯

極言朕過以至於斯將何以寤焉百姓仍遭凶阨無以相  
振加以煩擾虐苛吏拘牽虐徵文不得永終性命朕甚閔  
焉其赦天下 永光二年春二月詔曰蓋聞唐虞象刑而  
民不犯殷周法行而姦軌服今朕獲承高祖之洪業託位  
公侯之上夙夜戰栗永惟百姓之急未嘗有忘焉然而陰  
陽未調三光晦昧元元大困流散道路盜賊竝興有司又  
長殘賊失牧民之術是皆朕之不明政有所虧咎至於此  
朕甚自恥爲民父母若是之薄謂百姓何其大赦天下賜  
民爵一級女子百戶牛酒鰥寡孤獨高年三老孝弟力田  
帛又賜諸侯王公主列侯黃金中二千石以下至中都官  
長吏各有差吏六百石以上爵五大夫勤事吏各二級  
夏六月詔曰閒者連年不收四方咸困元元之民勞於耕  
耘又亡成功困於饑饉亡以相救朕爲民父母德不能覆

而有其刑甚自傷焉其赦天下 四年春二月詔曰朕承  
至尊之重不能燭理百姓婁遭凶咎加以邊竟不安師旅  
在外賦斂轉輸元元騷動窮困亡聊犯法抵罪夫上失其  
道而繩下以深刑朕甚痛之其赦天下所貸貧民勿收責  
成紀建始元年春正月乙丑皇會祖悼考廟災有星孛于  
營室詔曰迺者火災降於祖廟有星孛于東方始正而虧  
咎孰大焉書云惟先假王正厥事羣公孜孜帥先百寮輔  
朕不逮崇寬大長和睦凡事恕已毋行苛刻其大赦天下  
河平元年夏四月己亥晦日有蝕之既詔曰朕獲保宗廟  
戰戰栗栗未能奉稱傳曰男教不修陽事不得則日爲之  
蝕天著厥異辜在朕躬公卿大夫其勉悉心目輔不逮百  
寮各修其職悼任仁人退遠殘賊陳朕過失無有所諱大  
赦天下 陽朔元年春二月丁未晦日有蝕之三月赦天

下徒 二年春寒詔曰昔在帝堯立羲和之官命曰四時  
之事令不失其序故書云黎民於蕃時雍明以陰陽爲本  
也今公卿大夫或不信陰陽薄而小之所奏請多違時政  
傳曰不知周行天下而欲望陰陽和調豈不謬哉其務順  
四時月令三月大赦天下 元延元年春正月己亥朔日  
有蝕之夏四月丁酉無雲有雷聲光耀耀四面不至地昏  
止赦天下

哀紀元壽元年春正月辛丑朔日有蝕之詔曰朕獲保宗  
廟不明不敏夙夜憂勞未皇甯息惟陰陽不調元元不瞻  
未睹厥咎堪赦公卿庶幾有望至今有司執法未得其中  
或上暴虐假執獲名溫良寬柔陷於亡滅是故殘賊彌長  
和睦且衰百姓愁怨靡所錯躬迺正月朔日有蝕之厥咎  
不遠在余一人公卿大夫其各悉心勉帥百僚敦任仁人

黜遠殘賊期於安民陳朕之過失無有所諱其與將軍列  
侯中二千石舉賢良方正能直言者各一人大赦天下  
平紀元始元年夏五月丁未朔日有蝕之大赦天下 二  
年九月戊申晦日有蝕之赦天下徒

光武紀建武三年五月乙卯晦日有食之六月壬戌大赦  
天下 五年夏四月旱蝗五月丙子詔曰久旱傷麥秋種  
未下朕甚憂之將殘吏未勝獄多冤結元元愁恨感動天  
氣乎其令中都官三輔郡國出繫囚臯非犯殊死一切勿  
案見徒免爲庶人務進柔良退貪酷各正厥事焉 七年

三月癸亥晦日有食之避正殿廢兵不聽事五日詔曰吾  
德薄致災謫見日月戰慄恐懼夫何言哉今方念愆庶消  
厥咎其令有司各修職任奉遵法度惠茲元元百僚各上  
封事無有所諱其上書者不得言聖夏四月壬午詔曰比

陰陽錯謬日月薄食百姓有過在予一人大赦天下 二  
十二年九月戊辰地震裂制詔曰日者地震南陽尤甚夫  
地者任物至靜而不動者也而今震裂咎在君上鬼神不  
順無德災殃將及吏人朕甚懼焉其令南陽勿輸今年田  
租芻藁遺謁者案行其死罪繫囚在戊辰以前減死罪一  
等徒皆弛解鉗衣絲絮賜郡中居人壓死者棺錢人三千  
其口賦逋稅而廬宅尤破壞者勿收責吏人死亡或在壞  
垣毀屋之下而羸弱不能收拾者其以見錢穀取備爲尋  
求之 二十九年春二月丁巳朔日有食之遣使者舉冤  
獄出繫囚夏四月乙丑詔令天下繫囚自殊死已下及徒  
各減本罪一等其餘贖罪輸作各有差 三十一年夏五  
月癸酉晦日有食之是夏蝗秋九月甲辰詔令死罪繫囚  
皆一切募下蠶室其女子宮

和紀永元六年秋七月京師旱詔中都官徒各除半刑譴其未竟五月以下皆免遣十一年春二月遣使循行郡國稟貸被災害不能自存者令得漁采山林池澤不收租稅夏四月丙寅大赦天下

安紀永初四年三月戊子杜陵園火癸巳郡國九地震夏四月六州蝗丁丑大赦天下六年六月壬辰豫章員谿

原山崩辛巳大赦天下元初元年二月己卯日南地坼

三月癸酉日有食之夏四月丁酉大赦天下

互見  
改元

二年

三月癸亥京師大風五月京師旱河南及郡國十九蝗六月洛陽新城地裂九月壬午晦日有食之冬十月詔郡國

中都官繫囚減死一等勿笞詣馬翊扶風屯

互見  
從軍

妻子自

隨占著所在女子勿輸亡命死罪以下贖各有差其吏人聚爲盜賊有悔者除其罪四年春二月乙巳朔日有食

之乙卯大赦天下

順紀永建五年夏四月京師旱辛巳京師及郡國十二蝗  
冬十月丙辰詔郡國中都官死罪繫囚皆減罪一等詣北  
地上郡安定戊

陽嘉三年春二月己丑詔以久旱京師諸獄無輕重皆且  
勿考竟須得澍雨五月戊戌詔曰昔我太宗丕顯之德假  
于上下儉以恤民政致康乂朕秉事不明政失厥道天地  
譴怒大變仍見春夏連旱寇賊彌繁元元被害朕甚愍之  
嘉與海內洗心更始共大赦天下自殊死以下謀反大逆  
諸犯不當得赦者皆赦除之 永和四年三月乙亥京師  
地震四月戊午大赦天下 五年春二月戊申京師地震  
五月己丑晦日有食之丁丑令死罪已下及亡命贖各有  
差

質紀本初元年五月海水溢戍申使謁者案行收葬樂安  
北海人爲水所漂沒死者又稟給貧羸庚戌太白犯熒惑  
六月丁巳大赦天下

桓紀建和元年夏四月庚寅京師地震丙午詔郡國繫囚  
減死罪一等勿笞唯謀反大逆不用此書 三年夏四月  
丁卯晦日有食之五月乙亥詔曰蓋聞天生蒸民不能相  
理爲之立君使司牧之君道得於下則休祥著乎上庶事  
失其序則咎徵見乎象間者日食毀缺陽光晦暗朕祗懼  
潛思匪遑敢處傳不云乎日食修德月食修刑昔孝章帝  
愍前世禁徙故建初之元並蒙恩澤流徙者使還故郡沒  
入者免爲庶民先皇德政可不務乎其自永建元年迄乎  
今歲凡諸妖惡支親從坐及吏民減死徙邊者悉歸本郡  
唯沒入者不從此令八月乙丑有孛于天市京師大水九

月巳卯地震庚寅地又震詔死罪呂下及亡命者贖各有  
差 和平元年秋七月梓潼山崩冬十一月辛巳減天下  
死罪一等徙邊戍 永興元年秋七月郡國三十二蝗河  
水溢百姓飢窮流冗道路至有數十萬戶冀州尤甚詔在  
所振給乏絕安慰居業十一月丁丑詔減天下死罪一等  
徙邊戍 二年二月癸卯京師地震六月彭城泗水增長  
逆流京師蝗東海胸山崩九月丁卯朔日有食之閏月減  
天下死罪一等徙邊戍 永壽二年十二月京師地震三  
年春正月己未大赦天下 延熹四年春正月辛酉南宮  
嘉德殿火戊子丙署火大疫二月壬辰武庫火五月辛酉  
有星孛于心丁卯原陵長壽門火己卯京師雨雹六月京  
兆扶風及涼州地震庚子岱山及博尤來山並積裂己酉  
大赦天下 八年春正月丙申晦日有食之己酉千秋萬

歲殿火三月辛巳大赦天下

靈紀建甯元年冬十月甲辰晦日有食之令天下繫囚罪未決入縲贖各有差 熹平二年春正月大疫二月壬午

大赦天下 三年秋河水溢冬十月癸丑令天下繫囚罪未決入縲贖 四年夏四月郡國十大水五月丁卯大赦

天下延陵園災冬十月丁巳令天下繫囚罪未決入縲贖 六年冬十月癸丑朔日有食之辛丑京師地震辛亥令

天下繫囚罪未決入縲贖 光和二年夏四月甲戌日有

食之辛巳中常侍王甫及太尉段熲並下獄死丁酉大赦

天下諸黨錮小功已下皆除之時上祿長和浮言黨人錮及五族有乖典訓帝從之

三年秋表是地震涌水出八月令繫囚罪未決入縲贖

各有差 五年二月大疫夏四月旱五月庚申永樂宮署

災秋七月有星孛于太微癸酉令繫囚罪未決入縲贖

獻紀初平四年春正月甲寅朔日有食之丁卯大赦天下  
按遇災而赦班范兩紀有明著者有不明著者遇災之  
年有赦降之事必非無故桓靈二紀災異頻仍史不絕  
書赦降之事亦不絕書是否相因無他佐證今凡遇災  
之年而有赦降之事別無他故可考者悉彙於此以備  
參考而世運之盛衰亦藉以考見焉

劭農

文紀二年春正月丁亥詔曰夫農天下之本也其開藉田  
朕親率耕以給宗廟粢盛民謫作縣官及貸種食未入入  
未備者皆赦之

師古曰種者五穀之種也食者所以爲糧食也

景紀元年春正月詔曰間者歲比不登民多乏食天絕天  
年朕甚痛之郡國或磽陁無所農桑穀畜或地廣饒薦草  
莽水泉利而不得徙其議民欲徙寬大地者聽之夏四月

赦天下賜民爵一級

成紀陽朔四年春正月詔曰夫洪範入政以食爲首斯誠家給刑錯之本也先帝劬農薄其租稅寵其疆力令與孝弟同科間者民彌惰怠鄉本者少趨末者衆將何以矯之方東作時其令二千石勉勸農桑出入阡陌致勞來之書不云乎服田力耜乃亦有秋其勛之哉二月赦天下

明紀中元二年

明帝已即位

十二月甲寅詔曰方春戒節人以

耕桑其勅有司務順時氣使無煩擾天下亡命殊死以下聽得贖論死罪入縲二十四右趾至髡鉗城旦春十匹完城旦春至司寇作三匹其未發覺詔書到先自告者半入贖

飲酎

和紀永元八年八月辛酉飲酎詔郡國中都官繫囚減死

一等詣敦煌戍其犯大逆募下覆室其女子宮自死罪已下至司寇及亡命者入贖各有差

遇亂

魏紀中平元年三月壬子大赦天下黨人還諸徒者唯張角不赦注時中常侍呂強言於帝曰黨錮久積若與黃巾合謀悔之無救帝懼皆赦之

接此亂象已成不得已而爲此赦與平常之恩赦命意大不相同然已無及矣范書立黨錮傳著漢之所以亡也

獻紀初平三年五月丁酉大赦天下六月己未大赦天下董卓傳初卓以牛輔子婿素所親信使以兵屯陝輔分遣其校尉李傕郭汜張濟將步騎數萬擊破河南君朱儁於中牟其後牛輔營中無故大驚輔懼乃齎金寶踰城走

左右利其貨，斬輔送首。長安牛輔既敗，衆無所依，欲各散去。催等恐，乃先遣使詣長安，求乞赦免。王允以爲一歲不可再赦，不許之。催等益懷憂懼，不知所爲。武威人賈詡時在催軍，說之曰：「聞長安中議欲盡誅涼州人，諸君若棄軍單行，則一亭長能束君矣。不如相率而西，以攻長安爲董公報仇，事濟奉國家。目正天下，若其不合，走未後也。」催等然之，各相謂曰：「京師不赦我，我當以死決之。若攻長安，剋則得天下矣。不剋，則鈔三輔婦女財物，西歸鄉里，尙可延命。衆以爲然。於是共結盟，率軍數千，晨夜西行。王允聞之，乃遣卓故將胡軫、徐榮擊之於新豐。榮戰死，軫以衆降。催隨道收兵，比至長安，已十餘萬。與卓故部曲樊稠、李蒙等台圍長安城，峻不可攻。守之八日，呂布軍有叟兵內反，引催衆，得入城，潰放兵虜掠死者萬餘人，殺衛尉种拂等。

呂布戰敗出奔王允奉天子保宣平城門樓上於是大赦天下

按初平三年一歲三大赦正月之赦

詳特赦

卓未誅也卓

以四月誅五月之赦以誅卓也御覽

六百五十二

引謝承後

漢書曰陝中諸將求乞大赦王允等以爲殺卓時已赦今復求乞一歲不可再赦云云乃其證惟正月赦五月又赦何言一歲不可再赦乎六月之赦則催等已入長安不得已而赦然亦無救于亂使催等求乞但告以已在赦中則人心必渙賈詡之謀未必能行乃以允之疏而詡之賊漢室遂不可復興矣哀哉

赦二終